



Caderno da crítica

Cuestionario Proust: Suso Díaz

[Ramón Nicolás](#) 21 Marzo 2015

1.– Principal trazo do seu carácter?

– É ben difícil definirse. Coido que son un soñador.

2.– Que calidade aprecia máis nas persoas?

– A bondade e a xenerosidade.

3.– Que agarda das súas amizades?

– Só que me entendan.

4.– A súa principal eiva?

– Talvez querer abarcar máis do que son capaz.

5.– A súa ocupación favorita?

– Deixarme levar polo que me agrada, idear novos proxectos, sempre tentar sumar.

6.– O seu ideal de felicidade?

– A felicidade sempre é efémera. Un estado de felicidade enténdoo como algo semellante a ser lelo. Creo nos momentos de felicidade, e se algo se asemella a un tempo prolongado de felicidade vivina os primeiros 8 anos da miña vida en Ludeiros -Lobios-, onde nacín.

7.– Cal sería a súa maior desgraza?

– Non penso niso.

8.– Que lle gustaría ser?

– Sempre quixen ser cantautor, de aí a miña paixón pola poesía.

9.– En que país desexaría vivir?

– Nun que non existe, que eu imaxino e nunca coñecerei. Nun país que non se odie por ser o que é, que agarime e ame aquilo que o define, que se respecte, que medre dende a cerna herdada sen precisar ollarse en espello algún. Un país que ben podería ser unha Galicia mítica.

10.– A súa cor favorita?

– Transito entre azuis e verdes. Aínda que nada me reconforta máis ca o abrollar da primavera no Xurés.

11.– A flor que máis lle gusta?

– Todas, todas amosan beleza. De escoller, quédome co Lirio do Xurés.

12.– O paxaro que prefire?

– O que se pousa fronte á fiestra na casa de meus pais. Ese que me agasalla cos seus movementos, coa súa cor, co seu canto e co seu voo ceibe e despreocupado.

13.– A súa devoción na prosa?

– Sendo ben difícil: en galego Rosa Aneiros, en español García Márquez, en portugués Saramago.

14.– E na poesía?

– Imposible escoller. Dende Rosalía de Castro a Celso Emilio Ferreiro infinitas e infinitos poetas. Cada nova lectura é unha nova descuberta. Todas e todos os que me emocionen.

15.- Un libro?

– Dous. Agora mesmo os que me ocupan con novos proxectos: *Seis poemas galegos* de Federico García Lorca e *Follas novas* de Rosalía de Castro.

16.- Un heroe de ficción?

– Xan das Congostras.

17.- Unha heroína?

– Seguramente algunha que habita o subconsciente. A beleza ten rostro de muller.

18.- A súa música favorita?

– Moitas, moitísimas. Non podo escoller, depende do estado de ánimo. Iso si, sempre me fago acompañar por ela.

19.- Na pintura?

– Dun tempo a esta parte, Ovidio Murguía.

20.- Un heroe ou heroína na vida real?

– Miñas avoas, ninguén merece meirande admiración para min.

21.- O seu nome favorito?

– O de meus fillos: Sofía e Pedro, sempre na boca, sempre no pensamento.

22.- Que hábito alleo non soporta?

– A maldade en calquera das súas manifestacións: ruindade, mesquindade, falsidade...

23.- O que máis odia?

– Ese sentimento non me habita, de facelo, manifestase en contadas ocasións. Diría que odio o que fai sufrir ao ser humano conscientemente. Dabondo temos co que a vida nos vai deparando.

24.- A figura histórica que máis despreza?

– Todos eses innomeables que se adicaron a destruír a especie, tamén os que se adican a destruír o hábitat.

25.- Un feito militar que admire?

– Sempre abril. Sempre o 25 de abril.

26.- Que don natural lle gustaría ter?

– Unha meirande capacidade de comprensión, algunhas veces non atopo respostas por moito que me esforce. É frustrante.

27.- De que maneira lle gustaría morrer?

– De súpeto.

28.- Cal é o seu estado de ánimo máis habitual?

– Reflexivo.

29.- Que defectos lle inspiran máis indulxencia?

– Moitos. Tendo en conta que somos humanos, procuro entender.

30.- Un lema na súa vida?

– Meu avó materno sempre me dicía, Suso: fai ben e non olles a quen.